

KERATAN AKHBAR

TARIKH : 6 SEPTEMBER 2025

AKHBAR : BERITA HARIAN

MUKA : 20
SURAT

Pengekalan OPR sokong pertumbuhan ekonomi

Pengekalan OPR sokong pertumbuhan ekonomi

Keputusan Bank Negara Malaysia (BNM) mengekalkan Kadar Dasar Semalaman (OPR) pada 2.75 peratus mencerminkan pendirian yang menyokong di tengah-tengah ekonomi domestik yang berdaya tahan.

Pengarah, Penganalisis Strategi Pelaburan dan Ekonomi IPP Wealth Managers, Mohd Sedek Jantan, berkata dengan langkah itu, BNM dapat mengekalkan ruang dasar untuk melindungi daripada potensi ketidakstabilan dalam permintaan global.

Beliau berkata, disamping itu, ia dapat memastikan OPR kekal kondusif untuk pertumbuhan di samping melalui harga dan terus memantau impak global terhadap ekonomi Malaysia.

"Pada peringkat serantau, ini sejajar dengan trend yang lebih meluas dalam kalangan pihak berkuasa monetari ke arah mengekalkan kestabilan selepas kitaran pengetatan sebelum ini, menekankan peralihan daripada kawalan inflasi kepada pemeliharaan pertumbuhan.

"Malah, petunjuk ke hadapan menunjukkan bahawa perbelanjaan isi rumah dan pelaburan yang berterusan akan terus memacu pengembangan ekonomi tanpa menyebabkan ia terlalu panas (overheating), di samping sokongan berterusan kepada eksport daripada sektor teknologi dan pelaburan.

"Walaupun perkembangan dasar perdagangan masih boleh mempengaruhi prospek pertumbuhan global, ketidakpastian telah berkurangan setakat tertentu. Kos global yang terkawal, digabungkan dengan ketiadaan permintaan domestik yang berlebihan, dijangka mengehadkan tekanan harga," katanya.

BNM menerusi Jawatankuasa Dasar Monetari (MPC) pada Rabu memutuskan untuk mengekalkan OPR pada 2.75 peratus.

Sementara itu, Penganalisis Ekonomi UniKL Business School, Prof Madya Dr Aimi Zulhazmi Abdul Rashid pula berkata, langkah pengekalan OPR itu dianggap ideal bagi menyokong ekonomi negara serta perkembangan ekonomi global.

Beliau berkata, setelah menurunkan kadar sebanyak 0.25 peratus pada mesyuarat MPC yang lalu, ekonomi negara kini berada pada landasan terbaik untuk terus mencapai unjuran awal Keluaran Dalam Negara Kasar (KDNK) bagi 2025 iaitu antara 4 hingga 4.8 peratus.

Malah katanya, bagi Suku Pertama dan Suku Kedua tahun ini, pertumbuhan masing-masing mencatatkan 4.4 peratus walaupun berdepan cabaran ketidaktentuan ekonomi global berikutan pengumuman Presiden Amerika Syarikat (AS), Donald Trump, yang mengenakan tarif import ke atas pelbagai negara termasuk Malaysia.

Selain itu juga katanya, ekonomi domestik yang menyumbang hampir 90 peratus pertumbuhan KDNK turut mengekalkan momentumnya, antaranya melalui jualan kereta tempatan yang mencatatkan paras tertinggi di Asia Tenggara bagi tempoh Januari hingga Julai.

"Perbelanjaan kerajaan Madani, khususnya melalui program Sumbangan Asas Rahmah (SARA), turut menyuntik aliran tunai ke dalam ekonomi, memberi kesan berganda kepada sektor rumah, makanan dan pengangkutan.

"Bantuan tunai RM100 yang diagihkan kepada rakyat pada September dijangka membolehkan perbelanjaan RM2 bilion, sekali gus memastikan aliran wang kekal berlegar dalam negara," katanya.